

“Un Dia Den Bida cu documentario di Kura Hulanda

STA. CRUZ -- Ya den pasado e presentado di e programa di TV na Tele Aruba Poentje Castro y su Un Dia Den Bida a yega di presenta programanan ala estilo di documentario cu e resulta di ta contene informacionan

educativo y informativo pa tur esnan cu a sinta waak e diferente edicionnan nan aki. Entre otro nos por corda e dos edicionnan riba prostitucion riba nos isla. Tambe tabata tin un di e personanan special cu tin un



incapacidad mental. Un otro tabata e mucha homber cu ta sufri di e malesa Duchienne. Homosexualidad tambe a ricibi su atencion debido. Den tur e edicionnan menciona Poentje a combersa no tan solo un persona cu ta den un di e mundonan ey, sino a balanza e programa, door di a combersa cu profesionalnan riba e tereno, di prostitucion, Down Sydrown, malesanan muscular y un sicologo pa splica pa kico e comportacion di un persona cu ta gay.

80 añadi existencia di refineria tabata e documentario mas amplio cu e programa Un Dia Den Bida a yega di presenta, unda cu e historia completo y tur e companianan cu a run nos refineria for di tempo di Lago te cu awendia Valero.

Awe ta toca turno un proyecto cu a tuma masha hopi tempo mes pa por a realiza. Pa motibo cu ta praticamente un barío a wordo transforma den un combinacion di Naturaleza, museo y hotel. Nos ta papiando aki di Kura Hulanda (Manera cu nan mes ta scirbie). Un proyecto cu a start na aña 1998 y ainda tin cambionan tumando lugá. Poentje a combersa cu e brain tras di full e cuento di hadas cu ta e Hulandes Leo Helms. Meneer Helms ta e persona responsabel pa e creatividad sin limite di e bunita hotel aki, cual idea tabata soño di e miyonario Gelddekker. E prome plan tabata pa a traha un museo cu lo ilustra e añanan di

esclavitud na nos hermana isla Curaçao. Despues di a waak e edicion aki lo bo keda convenci cu berdaderamente esclavitud a yega di tuma lugá na Curaçao. Meneer Gelddekker no a escoge un tereno sin mas pa construi e museo aki, sino a trahe exactamente na e sitio cu e bendemento di e catibonan a tuma lugá.

Ta despues di a finaliza e museo e idea di expansion a nace y a cumpra e hotel Porto Paseo y tur casnan rond di dje, na unda cu ta un barío

completo mester a cuminza restaura. Despues di un inversion multi miyonario awe Curaçao tin un di e hotelnan mas completo den full Caribe. E ultimo cambio drastico tabata inauguracion di e casino.

Un programa educativo y interesante pa tur edad. Bo ta keda cordialmente invita. Sintonisa Tele Aruba canla 13, pasobra 23 lo transmiti beisball, pa 9'or anochi pa e historia bunita di “Kura Hulanda”.